



Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 8

Yangia anidakangma :



Tir Yimym



tiryimym@aolima



tir yimym

TAPAK 10



**Houthi missiles tsübuba agi Israeli
PM-i Saudi airspace mamshi**

**Punjab Kings Bowling coach
asütsü Damien Wright shim**



VOL. XVIII NO. 150 (ADOK 150) DIMAPUR

TENTONÜ (MONDAY)

METSÜREMI (MARCH) 15, 2021

₹ 5.00

Assam Congress-i BJP sorkar anema 12-Point 'Chargesheet' sayaogo

Guwahati, March 14 (Agencies): Assam nung Congress-i BJP sorkar anema 12-point "chargesheet" ka sayaogo. "BJP sorkari Assam nung item tebilemtsü onük 12 mapa meinyak" ta Congress-i ashi.

"BJP-i sorkar akümtsü tashi mangudangbo, jati-mati-bheti (community, land & base) kümzüka ayutsü nangzük saka ibaji melena parnoki Assam nung madak Citizenship (Amendment) Act (CAA) benok" ta Congress-i sangdong ka nung metetdaksü.

"Congress-i tenzüka yutsüba National Register of Citizens (NRC) BJP-i tembangtsü ta nangzük, saka parnoki NRC maparen nung tenokdangba agütsü" ta parnokisa ashi.

Congress indang "chargesheet" nung agüja aliba onük rongnung mapa indang shia lir.

"BJP-i kümshia Assam nung lakh 5 nem mapa agütsütsü ta nangzük, saka tanga tenangzükbatem ama ibajia meinyak" ta Congress-isa metetdaksü.

Assam sorkari tim mesüi nisung shimokba ken o tem aika adokogo aser parnoki state indang

rongsen jenjang dalang agi yokdoker. Assam nung oil fields nungi tenzüker Lokapriya Gopinath Bordoloi International Airport tashi yokdokogo, ta parnokisa ashi.

Congress indang chargesheet nungsa "Syndicate Raj", kechisarena nung jenjang atuba, süngolu nung mapa inyakertem atema mebilemtsüba, Scheduled Tribes jenjang magütsüba, tzümetsüng aser ali anenzüka aoba khuret mekoktetba aser aluyimer nem minimum support price (MSP) magütsüba indang shia lir.

Ajisüaka, külen BJP-ibo Congress indang chargesheet ji asayamenü ka dang ta meyiptsüogo.

"Congress indang 'chargesheet' ya asayamenü ka lir. Parnoki CAA indang osang tejangia shia mali. Barak Valley ama tesem kar nungbo CAA pusemer. Süngolu aliba tesemtem nung parnoki onok anema mejembitsüla, saka küm paika parnoki kechi inyak ta asüba meyiper parnok sasa asüngdangdangtsüla. Onoki süngolu tesemtem nung temelenshi bener arutsür" ta Assam BJP spokesperson Pabitra Margherita-i metetdaksü.

Amit Shah-i Assam nung tzümetsüng agientsü atema küm 5 talila meshir

Margherita, March 14 (Agencies): Tesüiba küm pungu tsüingda Brahmaputra ayong ponglang memerüktetba sülen Union home minister Amit Shah-i tanü nübortem dang Assam nung tzümetsüng agientsü atema BJP nem ano küm 5 agüjang ta mepishiogo.

Deobarnü Margherita nung election nüboyimba sentong ka nung o jembidang "BJP sorkari Bodo Accord teyari agia Assam nung kiralongraba agienogo. Tarubaji Assam nungi tzümetsüng agientsüba lir. Iba mapa inyaktsü atema BJP nem ano küm 5 agüjangma" ta Amit Shah-i ashi.

"Onoki satellite image teyaria agia Northeast repringdangogo. Onoki tzümetsüng khuret agientsü atema blueprint ka renemogo. Iba ajanga tzümetsüng timtem ajuruba tesemtem nung tourism mapa inyaktsü" ta paisha ashi.

Prime Minister Narendra Modi-i Brahmaputra ayong ponglang merüktettsü aser tzümetsüng khuret agientsü atema tzüküm anatsülen express highways yanglutsü nangzükogo ta 2016 küm Assam assembly election agiba sülen chief minister Sarbananda Sonowal aser finance minister Himanta Biswa Sarma nati metetdakja liasü.

Ajisüaka, Assam nung tzümetsüng agi timtemba nisungtem asoshi ibaji pungmang ka ama dang aruogo

aser tawa Parliament session nunga iba mapa inyaktsü atema onük kecha mebenok.

Margherita nungi BJP candidate Bhaskar Sarma atema nüboyimtsüadang Amit Shah-isa "Congress-i Badruddin Ajmal (All India United Democratic Front) mesüra Kerala nung Muslim League den tesentaktep ali tashi Assam lendongi aitsü" ta metetdaksü.

"Taoba küm 15 tashi Congress sorkar liasü. Parnoki Kaziranga National Park aser Satra land atsünga agidaktsü. Sonowal aser Himanta Biswa Sarma'er sorkari ali atsünga agirtem meindok. Rahul Gandhi-i pa tepi nung Badruddin mendaktsür arur süra Congress-i Assam kümzüka ayutsü asü?" ta pai asüngdang.

2019 küm Assam nung Citizenship Amendment Act anema lungkak aйдang lanur 5 tepsetba mezüngmeshia Amit Shah-isa "Onoki Assam nung lungkak aitba agientsüogo" ta tanü ashi.

"Tesüiba mapang Congress-i Assam nung lungkak aitba lanur noklang aika tepsetogo" ta Amit Shah-isa All Assam Students' Union-i nungitba Assam Jatiya Parishad (AJP) luja jembü.

Tesüiba mapang lungkak aiteremi (AJP) BJP nemtamakok ngudaktsütsü atema Congress den yariteper, ta paisha ashi.

Framework Agreement kübok telemtetba agitsüla: GPRN

Dimapur, March 14 (TYO): August 3, 2015 nü sign asüba Framework Agreement nung lateta aliba ama dang yimten latettsüla mesüra tebilemba lemsateptsüla ta NSCN (IM)-i Deobarnü metetdaksüogo.

"Ibaji amaji meinyakra onoki aser talisa Naga nungeri magizüktsü" ta Government of the People's Republic of Nagalim, Ministry of Information & Publicity sangdong ka nung ashi.

Framework Agreement sasep nung telok anaprongi maparen inyaktsü molungtepa lir. Naga nungeri alima tensa meteta dang lir aser onoki yimjung aser terenlok atema inyaker, ta MIP sangdong nungsa shia lir.

Prime Minister Narendra Modi-i mapang shia jembiba ama kati ka akhümtsüba aser

kasa jenjang nung züngshia meimchir shisatsü ajanga mekoktetba meimchir khuret kecha mali ta asüba nung onokia amanger, ta parnokisa ashi.

Indo-Naga olemtep nung India ketangsürtemi magizüktsütsü inyakba ajanga GPRN aser India sorkar tsüingda jembitepa aruba osang yimjak nung meshitetsüsa akümer, ta MIP sangdong nungsa metetdaksü.

Prime Minister's Office, New Delhi nung Framework Agreement sign süteper küm pungu tema süia arur. Framework Agreement nung sign asüadang Prime Minister-i anir minister tem, ketdangsürtem aser NSCN teshimtet telok aden aser alimaia South-East Asia nung telungpur khuret tejentiba angatettepba kanga süngmanga repringogo.

Framework Agreement ya tangbo yimjak nung sayuogo aser iba ajanga GPRN-NSCN-i Indo-Naga mangatettep ya yimten indang ta asüba agizükba kuli agütsür. Telok anaprongi teti atema rara anentsü aser "shared sovereignty" tangatetba nung khuret koktettsü molungtepogo, ta MIP sangdong nungsa metetdaksü.

Tesüiba mapang azütokshia aser takok chitepa liaka Naga nungeri tarutsü atema bilema India sorkar den khuret bentettsü aser putepshitsü molungogo, ta parnokisa ashi.

Taoba Prime Minister Atal Bihari Vajpayee-i aniba sorkari July 2002 nung Naga nungeri putiotsü aser yimten tensa khenyongi balaka ta agizükba atema Naga nungeri pelar, ta MIP sangdong nungsa metetdaksüogo.

COVID-19 Nagaland: Puteter aser taneptsü angur ka danga maliasü

Kohima, March 14 (TYO): Deobarnü Nagaland nung COVID-19 aliba puteter aser taneptsü angur shinga maliasü, ta Health & Family Welfare Minister S Pangnyu Phom-i metetdaksü.

Nisung 12,255 rongnungi 11,966 taneptsü nguogo aser tang parnok 14 anepaludar, ta paisha ashi.

"Nagaland nung COVID-19 nungi taneptsü angurji 97.7% lir. COVID019 puteta alir nisung 91 asüba nungi parnok 10 bo tanga timtem ajanga asü aser nisung 154 tanga state temi ogo" ta

Health & Family Welfare Director, Dr Denis Hangsing-ia metetdaksü.

Tang anepalurtemji Kohima nung 13 aser Mokokchung nung ka lir, ta paisha shisem.

Nagaland nung COVID-19 alitsü akok ta temolung melemba sample 1,33,812 tendangogo. RT-PCR ajanga 75,257, TrueNat ajanga 37,475 aser Rapid Antigen Test ajanga 21,080 tendang ta Dr Hangsing-isa metetdaksü.

Honibar tashi nung Nagaland nung COVID-19 vaccine dose

54,427 agütsüogo, ta State Immunization Officer Dr Ritu Thurr-i ashi.

Nisung 44,693 rongnung teintet rogo 3,471 aser arishi küm 45 ser temapur 616 dena lir, ta paisha ashi.

Vaccine agirtem rongnung frontline workers 29,567 aser healthcare workers 11,039 dena lir.

"Maneni, healthcare workers 6,500 aser frontline workers 3,234-i COVID-19 vaccine dose anaprong agiogo" ta Dr Ritu Thurr-isa metetdaksü.

Bank nung mapa inyakertemi Mar 15 & 16 anogotem lungkak aitsü

Dimapur, March 14 (Agencies): United Forum of Bank Union (UFBU) Nagaland-i anogo ananü-March 15 aser 16 lungkak aitsü ayongzükogo.

Iba osang ya All India Bank Officers' Confederation (AIBOC) state secretary Tap Paul-i metetdaksü.

India sorkari bank tem privatization asütsü tebilemba anema iba lungkak aitba sentong ayongzüker, ta Paul-i ashi.

Iba sentong nung private sector bank nung mapa inyakertem ajak dena lir, ta paisha shisem.

UFBU-isa sorkar dang public sector banks akangshitsü atema takhangba agütsüogo.

March 15 aser 16 anepdang 9:30 akonung UFBU unit Nagaland-i Supermarket complex nung SBI regional business office anasa mener lungkak aitsü ta Paul-isa ashi.

Maneni, Mokokchung nung SBI regional business office aser Kohima nung Deputy commissioner office anasa SBI main branch nunga kasa lungkak aitba sentong agitsü ta paisha metetdaksü.

Bank Union temi Privatization anema lungkak aiter

New Delhi, March 14 (Agencies): Sorkar meyong bank ana privatize asütsü inakyim anema United Forum of Bank Unions (UFBU)-i linük ajungalen lungkak aitsü ayongzük.

Finance Minister Nirmala Sitharaman-i Union Budget benokdang public sector banks (PSBs) ana privatization asütsü ashiba sülen ita ka shi lir anogo pezünü (March 13-16) lungkak aitsü ayongzükogo.

Iba lungkak aitba sentong ajanga deposits aser withdrawal, accounts tasen lapokba, cheque clearance aser loan approvals nung timtem ajurutsü. Ajisüaka, ATMs maparen nungbo mekongshitsü.

UFBU ya telok 9 lokteper tentetba lir aser parnoki ashiba agi iba sentong nung bank nung mapa inyaker aser ketdangsür lakh 10 shi kati shilem agitsü.

State Bank of India (SBI) dena public sector bank aikati parnok customers dang lungkak aitba ajanga maparen nung tetsükdaktsü ajurutsü ta metetdaksüogo. Ajisüaka, SBI-ibo parnok indang

kongsang aser office ajak nung mapa shitak inyaktsü atema renemogo ta shiogo.

Centre sorkari 2019 küm IDBI Bank privatised asü aser shilem tulubalen LIC dang yokdok. Sorkarisa public sector banks 14 lokteptsüogo.

United Forum of Bank Unions (UFBU) nung All India Bank Employees Association (AIBEA), All India Bank Officers' Confederation (AIBOC), National Confederation of Bank Employees (NCBE), All India Bank Officers' Association (AIBOA) and Bank Employees Confederation of India (BEFI). Others are Indian National Bank Employees Federation (INBEF), Indian National Bank Officers Congress (INBOC), National Organisation of Bank Workers (NOBW) aser National Organisation of Bank Officers (NOBO) dena lir.

HDFC Bank, ICICI Bank, Kotak Mahindra Bank, Axis Bank aser IndusInd Bank nungbo lungkak aitba mapang banking services shilem asemsü nungi kabo akhi ama inyaktsü ta metetdaksüogo.



Kuda A Khel pur küm 50 'Dzevi Kehou' benjongmung March 13, 2021 nü Jotsoma Community Hall, Dimapur nung munga liasü, kong Keneizhakho Nakhro, MLA ajanga iba benjongmung moatsü.

Tanü state nung World Consumer Rights Day amungtsü

Dimapur, Metsüremi/ March 14 (TYO): Küm shia March 15 nü World Consumer Rights Day amunger, aser iba anogomung temaitsü ya 1962 küm iba anogo US Tir John F. Kennedy ajanga American Congress nung jembiba mapang consumer rights pezü sangdonga liasü, ta Nagaland Voluntary Consumers' Organisation (NVCO) ajanga ashi.

Iba sülen tang International Consumers (IC) ta ajaba, International Organisations of Consumers Union (IOCU) ya ajanga temeden talila pezü inoksem. Item temeden ji Right to safety, Right to be informed, Right to choose, Right to be heard, Right to redress, Right to consumer education, Right to a healthy environment aser Right to basic needs alitsü.

India sorkaria item temeden ya 20 point programme nung inoksem aser United Nations Charter of Human Right nunga inoksema amshia arur.

Iba sülen 1983 küm nungi tenzüka alima ajunga nung nüburtemi iba anogomung munga arur. Nagaland nunga World Consumer Rights Day ya state sentong ka ama 1997 küm State Academy Hall Kohima nung Kezhokphoto Savi convenor sür iba mapang Nagaland Chief Minister

inyaka alisang, Dr. S. C. Jamir tongti tesemdang ka ama munga liasü.

Iba sülen Nagaland nung küm shia World Consumer Rights Day ya Govt. of India, Ministry of Consumer Affairs, Food & Public Distribution System, New Delhi totuyuba nung munga arur aser ibai International Consumer movement den külemi amunger. Ajidang masü United Nations ajanga Consumer Protection atema guidelines yangluba tenüng nung 1985 küm nungi mungyonga arur.

Talisa consumer ajunga temeden ajungkettsü, item temeden akumtsüba wazüka ayutsü tang ya mapang lir. World Consumer Rights Day ya 1983 küm March 15 nü mezüng munga liasü. Küm ana lir, 1985 küm April 9 nü United Nation indang General Assembly ajanga UN Guidelines for Consumer Protection ya adopt asü.

Nagaland nung alima ajunga den külemi 'Tackling Plastic Pollution' omen nung ajemdaker World Consumer Rights Day amunger. Küm shia Department of Legal Metrology & Consumer Protection (LMCP) ajanga district shia department kübok sentong balala ayongzüka amunger aser nisung ajak consumer kaka ta angatetdakja aser pei temeden

angatetdakja banner tem inoker.

Taküm Nagaland Voluntary Consumers' Organisation (NVCO) ajanga World Consumer Rights Day ya hopta ana amunger, koba March 15, 2021 nü tembangtsü.

Nagaland Voluntary Consumers' Organisation tir Kezhokphoto Savi, shiba First Prize National Award angur ka lir, pai ashiba agi, "Consumer movement ya kanga tongtibang lir ta nüburtem nem angatetdaksütsü aser consumer nem pei temeden tali metetdaksütsü mechi iba anogomung ya maongka tajung ka ama agizüker."

Consumer rights aser consumer ka teinyaksü indang awareness ya yimdak yimtsüngtem nung tenüngdakba lir aser iba tebilemtsü ya asenok ajaki abentsüla, ta pai ashi.

Consumer ajangzüksü aser temeden wazüka ayutsü atema state sorkari tongi shilem agitsüla. Consumer temi timtem aser metokmeperi ajuruba mapang Nagaland State Consumer Helpline Toll Free No. 1800 - 345 - 3701 nung call süa jembitettsü aser iba sülen District Consumer Disputes Redressal Forum mesüra State Commission mesüra National Commission dangi abentsü akok.



Alumni Association, Patkai Christian College (AAPCC) ajanga March 14, 2021 nü Cafeteria ka semzüka iba college nung taoba mapang zünga alir aser tang college indang chaplain inyaksang Rev. Vichukho Ngukha-i iba tesem ya meshiteta sarasademtsü. College campus nung lenmang yanglushitsü aser danga terenlok mapatem inyaksü nükjidong nung alumni association ajanga iba cafeteria ya campus tasenba nung lapoka lir.

Dimapur Police-i özüng aibelenertem apu

Dimapur, Metsüremi/March 14 (TYO): Trendz showroom, Dimapur anasa Kher Mahal nung March 12, 2021 nü shishilembar dang özüng alema senotsü meshia aliba mapang Dimapur Police-i Padam Pukhuri, Dimapur nung alir Hoto Ayemi apu aser pa ket nungi UNPG NNC (Parent body) Ministry of Chaplee Affairs tax slip 23, Duplicate money receipt ana, Mobile handset ka aser sen 500 nguteta liasü.

Iba dak sendakba nung ken o ka East Police Station

Dimapur nung benoka lir. Dimapur Police-i March 13, 2021 anogo Chumoukedima nung Patkai apu anasa truck Regd No.NL01L9951 ka soita Sanamacha Singh'er jabaso Poklen Singh apu. Iba gari mita bushiba mapang police temi rum (Zeno) cases 146, Cane Beer (Turbog) cases 19, Beer (Kingfisher) cases 23 aser Whiskey (Mc Dowell) cases 21 nguteta liasü. Iba dak sendakba nung ken o ka Chumoukedima Police Station, Dimapur nung züluoka lir, ta sangdong ka ajanga ashi.

LBA ajanga Children Day of Prayer ayongzüker



March 14, 2021 nü Liangmai Baptist Church pur Children Day of Prayer sentong agidang Rev. N. Silubo Pastor ajanga tila tanurtem moatsüba mapang tangokba noksa ka yangi angur.

Dimapur, Metsüremi/March 14 (TYO): Liangmai Baptist Association (LBA) Nagaland ajanga March 14, 2021 nü Kohima Liangmai Baptist Church D. Block nung Children Day of Prayer sentong ayongzüka liasü.

Iba sentong nung Rev. N. Silubo Pastor KLBC ajanga jembiba mapang, tila tanurtem ya nisung meimchir nem

Tsüngremi agütsüba senti sempet ka lir, ta ashi.

Tila tanurtemi kisang aser yimtung nung tepela bener arutsür, ta pai ashi.

Rev. N. Silubo Zeliang-isa tanurtem dang pei tsürabur akhumtsüputtsü ajungshi aser yamaji inyakba ajanga Tsüngremi temoatsü nenok den alitsü aser alima nung arishia jangratema alitsü, ta ajungshia liasü.

Indisen nung International Women's Day munga liasü



Dimapur, Metsüremi/ March 14 (TYO): Hope Channel Dimapur ajanga Sakhi- One Stop Centre, 5th Assam Rifles aser NABARD den lungjemer Indisen, Dimapur nung March 8, 2021 nü International Women's Day munga liasü, ta menur anguba osang ka ajanga ashi. Iba sentong nung Mrs India 2017, Dr. Dyuy Meena Mudang ya tongti tesemdang ka am arua dena liasü.

Iba sentong nung wadang balala nungi tetsürtem nem tenüngsang agütsü aser item rongnung Naga tsür mezüng kisüngi motorcycle nung Nagaland sema jajala Onen Nenty; Bollywood film industry nung Naga tsür mezüngbuba Rose Longchar; tetsür

entrepreneur (ceramic pottery) Lipok; tetsürtem rongnung mezüng Bike Mechanics Pngam aser Ninglei; special Athlete of Special Olympics Nagaland Merensenla Lemtur; Nagaland nung delivery mapa inyaker tetsür mezüngbuba Ketoulono; entrepreneur (Handloom & Handicrafts) Wapangienla aser child prodigy (Yodelling) Akumsenla nungertem dena liasü.

Sentong nung tongti tesemdang jembiba mapang tetsürtem dang tajungtiba nung takok angutsü asoshi pei sasa soita mayutsü ajungshia liasü. Sobaliba aser lokti tangatetba ajanga tetsürtemi pei sempet amshia tajungtiba jenjang tongtetba nungi nokdang, ta lai ashi.

Arunachal Deputy CM Chowna Mein-i bike rally tenzüksü



Arunachal Deputy CM Chowna Mein-i bike rally tenzüksüba noksa nung angur.

Namsai, March 14 (Agencies): Arunachal Pradesh deputy chief minister Chowna Mein-i 'Honda SunChasers 2021 - H'ness Quest for the Land of the Rising Sun' tenzüksüogo.

Iba sentong ya Arunachal Pradesh Tourism Department den yaritepa ayongzük.

"Namsai nung 'HondaSunchasers 2021-H'ness Quest for the Land of the Rising Sun' signature motorcycle rally tenzüksüogo. Tourism

department-i iba rally ayongzükba atema tenüngsang agütsür" ta Chowna Mein-i metetdaksü.

Iba rally nung adenertemi anogo tenetnü atema Arunachal Pradesh sema senzütsü.

Himalayan Motorsports Association president Vijay Parmar-i anir par teloki runners 11 aliba convoy len anitsü. Parnoki Bomjir, Hayuliang, Walong aser Namsai tesemtema ajangtsü.

DriveSpark aser 11 expert riders managing editor Jobo

Kuruvilla-ia iba rally nung adentsü.

Honda SunChasers 2021 ya March 9, 2021 nü Ruksin (East Siang district of Arunachal Pradesh) nung tenzük.

Iba sentong tenzüksüdang HMSI director, sales & marketing Yadvinder Singh Guleria aser Arunachal Pradesh Legislative Assembly speaker Pasang Dorjee Sona nati anir Honda Two-Wheelers India aser state sorkar ketdangsürtem aden.

Aizawl nung NLFT (PD) tanishir Parimal Debbarma apu

Agartala, March 14 (Agencies): Mizoram yimtiba Aizawl nung National Liberation Front of Tripura NLFT (PD faction) mendenbuba puogo.

Hokolbar aonung Aizawl nung NLFT tanishir Parimal Debbarma apu.

"Parimal Debbarma anir arutsü atema Tripura Police telok ka Deobarnü Aizawl-i ogo" ta Tripura Director General of Police, VS Yadav-i ashi.

"NLFT (BM) dak alia

NLFT (Parimal) ta ser ano telungpur telok ka lir. Parimal Debbarma ya taoba mapang NLFT (BM) nung liasü. 2014 küm pa temai adok" ta Yadav-i ashi.

"Parimal-i küm ana Tripura nung aliba sülen 2017 nung Bangladesh-i jena ao. Idakji pai NLFT züngsemtem den telok balaka tentet. Tawa tu pa Aizawl-i ao" ta paisa metetdaksü.

"Parimal Debbarma-i March 11 nü Aizawl-i aru. Par telok sasep nungi police nem

osang sangoktsü. Onoki osang angazükba sülen Tripura Police-i Mizoram Police nem osang sangoktsü aser Hokolbar aonung Debbarma apu" ta Tripura DGP-isa metetdaksü.

"Tripura nung Autonomous District Council election agitsü aliba nung NLFT (BM)-i mapa inyaktsü tejangraba liasü. National political party lennirtemi parnok den osang agitepa liasü. Item lennirtem dang onoki asüngdangyatsü" ta Tripura DGP Yadav-isa metetdaksü.

AGP-i candidate list tasembuba sangdongogo

Guwahati, March 14, 2021 (Agencies): Assam Assembly elections atema BJP den yaritepba telok- Asom Gana Parishad (AGP)-i candidate indang list tasembuba metetdaksü.

AGP indang candidate list tasembuba nung constituency 13 atema candidate tenüngtem agüja lir.

Deobarnü constituency 13

atema AGP-i sangdongba candidate tem ya Assam Assembly elections indang phase tasembuba nung tokteptsü.

AGP-i shimtetba candidate tem- Phani Bhusan Choudhury (Bongaigaon), Kamalakanta Kalita (Chaygaon), Ramendra Narayan Kalita (Guwahati West), Bhupen Rai (North Abhayapuri), Javed Islam (Mancachar), Purnendu

Banikya (South Abhayapuri), Jyotish Das (Goalpara East), Sheikh Shah Alam (Goalpara West), Ranjit Deka (Bhawanipur), Gunindra Nath Das (Barpeta), Kalpana Patowary (Sarukhetri), Rabiul Hussain (Sessa) aser Jyoti Prasad Das (Boko).

Assam Assembly election indang tasembuba phase ji April 6, 2021 nü agitsü.

AR-i Rs 79 lakh alangba poppy tejang apu



Aizawl, March 14 (Agencies): Mizoram nung ozüng alema mozü shibelenba anema inyaka arudang Assam Rifles-i Champhai district nung Vangchhia anasa poppy

tejang aika apu.

Osang angazükba sülen Assam Rifles sepaitemi iba tesem nung truck gari asem soter mita repringdang poppy tejang bena aliba putet.

Poppy tejang indang

jenjangji Rs 79 lakh shi alang liasü ta parnoki ashi.

March 10 nü Assam Rifles sepaitemi Mizoram kübok Champhai district anasa Rs 89 lakh alangba kozüjang apu.

Kangpokpi nung morok mi lendong tulu paidoktet

Imphal, March 14, 2021 (Agencies): Manipur nung Kangpokpi district kübok Sangaithel aser Khoken yimtsüng meketa aliba arem ka nung morok mi adok.

Ajisüaka, mi ensepertermi kanga dang jeretpera mapa inyakba ajanga morok mi lendong tuluba moudaktsüi azüoktetogo.

Manipur chief minister N Biren Singh-i sensopur ajak dang, state kübok asen meketa aliba aremtem nung morok mi lendong adokba nungi kümzüka yutsütsü asoshi kanga kümndanga alitsüla ta ayongzük.

"Kangpokpi District nung Sangaithel aser Khoken yimtsüngtem nung morok mi lendong tuluka nokdangtsüsa

Manipur Fire Service-i mapang shitak nung mapa inyakba osang angashia pelar. Asenok libajen kümzüka ayutsü asoshi ajak dang kümndanga alitsü mepishir," ta N Biren Singg-i Twitter nung ashi.

Taküm January ita Manipur aser Nagaland indang Dzuko Valley nung morok mi lendong ajanga süngdonglidong balala jenti samatsüogo.

Iba Valley nung mi remseptsü atema anogo 10 tashi agi.

Dzuko Valley nung morok mi remseptsü atema state anaprongla nungi National Disaster Response Force teams, army personnel, firefighters aser state police force tem longjemer inyakba ajanga iba morok mi remseptet.



Biswanath district kübok Gohpur nung Union Defence Minister aser BJP lennir Rajnath Singh-i Assam assembly election atema nüboyimba sentong ka nung o jembiba angur.

Kokrajhar nung prangpong-injangtem ngutet



Kokrajhar, March 14, 2021

(Agencies): Assam Assembly election agitsü aliba jakdang Honibar aonung Kokrajhar district kübok security forces-i AK rifle densema ozüng alema benshiba prangpong jenti ngutet.

Kokrajhar district indang Bichmuri area kübok Dighilipara tesem nungi prangpong-injangtemji ngutet.

Osang tejangja ka angazükba nung ajemdaker Kokrajhar police den paramilitary forces longjemer Honibar aonung Bichumari arem mita ao.

Iba arem mita aoba mapang, security forces team-i 56-caliber rifle ana, magazine ana, revolver ka aser injang 29 densema item prangpong ngutet, koba arembok nung item prangpong aser injang

meimbanga yur liasü.

Security Forces-i ngutetba prangpong aser injangtem ya taoba mapang telungpurtem indang ta jangjatetogo, ta Special Police DGP (TAP) aser BTAD ADGP (in charge) LR Bishnoi-i ashi.

Taküm küm tenzüker külen nungi, Kokrajhar Police-i prangpong 60 tashi nguteta lir.

March 10, 2021 nü Chirang Police indang team kati Chirang Reserve Forest telung nungi AK series Rifle aser injangtem, 7.65 mm Pistol den injangtem aser 9 mm Pistol den injangtem ngutet.

Bishnoi-i ashiba agi, aruya aliba Assam Assembly election mapang timtem kecha melii iba Election tesünep nung agitsü asoshi tapet mera ajak inyaktsü.



TIR YIMYIM YIMOBILEM (EDITORIAL)

DIMAPUR TENTONÜ, METSÜREMI (MARCH) 15, 2021

SENMANGTSÜMANG

Tanü putu tensa nung asenok sobaliba aser loktiliba nung temelenshi tuluka adoka angubaji, ali rongsen senmangtsüman angbare nung teburtemi dang masü saka tetsürtemi dena amangtsüsa atalokbatem ya asütsü. Asenok tetsü tebuo sobalibaren nungbo tetsürtemi ali senmang amangtsübaji kenyonji lenmang mali, tamakoktsü, kechiyong koba yim südirsüaka teburtemi aküm aser teburtemi dang alu kimong lemsar ali, anungji asen tsürabur lima nung akhi lepteptsüngtep mapang mesemteta akümba yimtak yimtsüngtem nungbo tanü tashi alu kimong nung tetsürtemi kibur süa amangtsübaji makoker aser makoktsü südi. Ajisüaka, tanü asen loktiliba nung tetsürtem jenjang reprangdangra, tetsürtemji teburtem dang nungi tilaba aser teküpbokba jenjang nung alirtem masü saka tetsür aikati teburtem jenjanga dena alemtetogo. Aji oda, tetsürlajibo tular saka teburasangjibo lar kilir, gari anishir mesüra la anüker sepai ka dang ta asüba jenjang nung alir tetsür aser tebur aika lir. Ibaji dang masü saka kidang kibong nunga kinungbobo kecha meinyaker saka kinungtsüang mapa inyaker ta asüba kibongtema aika lir. Item temelenshitem denji asenok tsürabur sobaliba nung ali senmang amangtepa aruba ya kodang medemdangdir, tanübo teburtemiang tetsürtemi ajangzüka ali senmang amangtsüsa akümba putu ka nung asenok liadokogo ta angatetter. Iba tangatetba nung asenoki taoba hopta tepiyong alima nung tetsürtem anogo amongba den külemi iba osangkaket nunga “asenok sobaliba nung ali senmang amangtepba yimya ya akhi tsürabur senmang aser tanü putu senmang ta ana küma bendanger amangtsü tenzüka nunga koma süla?” ta asüba onük nung bilemdangogo. Atangji, joko asenok aika pei tsürabur yimtsüng nungi pilar, alima tasen mesemteta, joko bendang lima agi asen lima küma sobalibaa aoer asünungji, kibong aika nung ali senmang ya teburtemi dang amangtsü ta masü saka tsürabur aser jala jabasotem tsüngda tangatettep nung lemsaa amangdaksür. Ajisüaka, ano khenkhenbo kibong kar meyongbo tebur agi mesosemra, teburanger kinunger aser adianutemi par ali semangtem agiadokba otsüa angashir. Ibaji temulung ashitsüka saka parnok taia masü, kechiyong asenok akhi sobaliba senmangtsüman angbare onük nung peisasa tangatetba agi melenshia aoer dang ashi, yimten telemtetba ka maka, pei tangatetba agi senmang alemer. Item ajakji bentettsü atema asenok Aor ali senmang amangtepbaren nung akhi tsürabur senmang aser tanü putu tasenba senmang ta ana küma bendanger amangtsü tenzüktetra, iba jagi tetsürtema makoksatsü aser nisung sür kinunger adianutem dena tamajung metenteptsü. Aji oda, akhi otsüla oboula nung mapang nungi kechi koda teburtemi dang ali senmang amanga aru, ibajibo meraksatsüi yamaji amangyonga aotsü. Iba senmang nungji teburtem asoshi tagitsü dang masü saka sentsü otsütsüba khureta dena lir. Ajisüaka, tanü putu tasenba nung pei akhi tsürabur yim among adena orr peisasa yatetba aser ajangzüka alu, kimong aser kiojentembo tetsür tebur ta mali, tsüraburi shiba nem kechi agütsüner, iba amaji lemsaa amangdaksütsü temeten agütsütsüla. Iba amaji sentsü senmangjia külem khuret asütsüla. Tsüraburtemia pei ali rongsen senmang tanurtem nem lemstü dang, tambusang mesüra tantsüla ta masü shibabo kechi nüngdaker, iba nüngdakji apia lemstü tajungba asütsü. Aji oda, tanurbo aika saka kibo ka dang ta süra tanurtem rongnung, tantsüla tambusang ta masü saka anko majungba ka nem aji lemzüksüang tajungba, kechiyong pai mesüra laibo kecha meinyaktettsü, anungji tarutsü nung timatemtsü saka tangaribo tsürabur ki dang nungi tajungba yanglua lia otettsü. Iba amaji, tanü putu tasenba nungbo ali senmang amangtepba yimya ya tetsür tebur ta dang masü saka tantsüla tambusang ta asüba inyakyim dena endoker tsüraburi, tetezü kiburi, tagitsü süli mesüra sentsü senmang süli, peii mulungba ama lemstütsüsa temeten aser tangatetba alitsüla.

OLEMSABANG

TEMO AKETBA NORTHEAST INDIA ALIMA WARA SÜLEN ALA-ASHI KOKTETTSÜYIM

S. Temjen Imchen

(Yashi adok nungi...)

Telongjong terenlok asoshi tashi aser Northeast nung Tebilemstü kar

NEI ya rongsenren jungjunga renlokra, asenok peribaji dang masü, saka India linük adena yaritettsüsa tashi lir ta shia angur (Cf. *Emerging North-East India*, 2015, p.6). Iba tsütsülen tashi aitlena aser tashi maitlena tatsüka ajidangdi.

a. NEI tashi aitlen kuli:

Tamalen ashiba ama, iba tesem nung item lemantem nung tashi aita angur:

- (i) Tourist tephutsütem (attractions) – Bendangli sema senzür atema NEI nung item tephutsütem ya alima yimya nung keta lir: The Blue mountain (Phawngpui) and Palak Lake in Mizoram; Kangla Fort and Loktak Lake in Manipur; The Elephant Falls in Shillong, and Cherrapunji –one of the world's wettest regions located in Meghalaya; World War II - War cemetery in Kohima; Dzukuo Valley & Dzulakie in Nagaland; Majuli river island of Brahmaputra, Kaziranga Reserve Forest, and Kamakhya Temple (Guwahati) in Assam; aser ano aika lir.
- (ii) Nübur sobaliba – Iba tesem nungsa ano lisopur-sobaliba (tribal culture) tajung jenti angur.
- (iii) Süngo lu jenti kar – Süngo lu aika Assam, Meghalaya, Nagaland, etc, nung züsentetba angutsü. British sorkar yimsüsüba mapang nungi tenzüka yutsüba tang tashi iba luyimji junga acha-ayanga aoba angur. Ibaji kanga tajung.
- (iv) Rubber aser coffee lu jenti tsünütetba tesem.
- (v) NEI tesem nungsa tetsür-tebur asadangba yimya – koba dang 'gender development index' ta ajar, ibajia junga yuteter.
- (vi) Awou (bamboo) nung taka-tait tesem.
- (vii) Ola-angla aser takdo-takra (handloom and weaving) tasa ya NE nung lokti ajak nung meteta amshiba angutsü.
- (viii) Ali telung nungi adokba oset tsüset shinü-lung (limestone), tzü ajanga adokba tesangwa (hydropower) item lemant peria dang angur.
- (ix) Tesetep alijak jaka, aser
- (x) Tzü-mopung temerük angudak tesem.

Anungji NEI nung tashi akaba lemant jenti lir ta sayur. Tarutsü anogotem asoshi sorkar balalai itemji junga acha-ayanga amshitsü tim. Assam aser Meghalaya state ana dak alaka, tanungba state-temji ali temo aketba lima nungi adokba aser anguba senti osettem shitakbayim nung achaayang mesütetba timtem reprangteter.

b. Tashi-maitbatem: Iba NEI nung alima meraket yimya-yimpong tajung jenti liaka, ano külenbo asenok tashi maitba tsütsü nungia mapa kar lir. Itemji ya:

- (i) Asen NE ya athang aser lungpang jenti agi akümba lima ka lir, koba ajanga State teimba ka ali-lenmang dak metaloka lir. Terenlok asoshi ibaji majung;
- (ii) Bendangli sema senzür asoshi ki-ojen peria makaba;
- (iii) Mapa inyakeri anungba;
- (iv) Tsümetsüng aser anentsü;
- (v) Aki-aküm akaba ozüngji ali kibur atema dang;
- (vi) Projects balala aiben meinyakteti raktaka ayur; aser
- (vii) Wapetsa aliba states aika.

NEI nung maka mait aser alima tanga-i aoba teratem

Maka-mait tia aser pei lima doktsür tanga limai aoba tongtibang tera ana lir: Ibaji tajemzüka aluyimba yimya aser mapa inyaker wain-shin junga makaba pur aika lir (*National Institute of Rural Development - NIRD & NERC, Guwahati; Vision 2020 for the North-East Region/NEC report nung agütsüba ama*). Item kuli ana jagi mapa manguba tebilemstüji adoktsür. Abenjagi, NEI doktsür India lima mulungleni otepba yimya-yimpongji ataloker. Anosa osang ka nung yamai ashiba angur, “Migration of local people to urban areas (happens) for employment prospects” (See the official report of KPMG-FICCI entitled, *Emerging North-East India: Economically and socially inclusive development strategies*: November 2015 (p.7) at KPMG.com/in, accessed on 20.10.2020).

Maka-mait dak alaka ano item kuli ajanga, asen NEI nungi India nung jila balalai aoba item kulitem lir:

- (i) Lanur-rogo asoshi sen a-adak jaka peria maliba agi;
- (ii) Meimchir achaayangtsü (management of human resources) junga memetetba agi. Iba nungji hikateter alir-a aser mihikateter asoshia mapa inyaksü lemant peria maka;
- (iii) Jila aser yimti nung zünger alirtem mapa munguteter tesa;
- (iv) Kol-engine-kharkana aser oset-tsüset adokdak mapa inyaklen peria maka;
- (v) Sorkar aser lokti tentet office nung tejak-ajia mapa agütsüba aser teraksa atenbayong;
- (vi) Business Public Outsourcing aser Call Centres maka/peria makaba agi; aser
- (vii) Aener dang ajungba aser anepalubaren (hospitality sector) jaka aser ki-o-jen peria maka.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Egypt nung akhidang Khristantem aser putirtem aliba tesem ka tutet



Egypt nung Bahariya Oasis kübok Tal Ganoub Qasr al-Agouz site nung akhidang Khristantem aser putirtemi aliba tesem noksa nung angur. Iba noksa ya March 13, 2021 nü Egyptian Ministry of Tourism & Antiquities-i sayaa liasü.

March 14, 2021: French-Norwegian archaeological team kati Egypt kübok Western Desert nung Aso 5buba mapang Khristantem aliba tesem ka tutetogo, ta March 13 nü Egyptian antiquities ministry-i metetdaksü.

Archaeological team-i Egypt nung Bahariya Oasis kübok Tal Ganoub Qasr al-Agouz site nung tang agi tasembenbiba excavation campaign agiba mapang nung 'basalt' long agi yangluba building aser lungro agi yangluba kitem tutet," ta ministry-i sangdong ka ajanga metetdaksü.

Iba complex nungji sector 6 lir aser Tenla ki teraksa asem den putirtem aliba takdangtem lir," ta Egyptian antiquities ministry kübok Islamic, Coptic & Jewish Antiquities nung tongti, Osama Talaat-i metetdaksü.

Iba mission nung tekolak, Victor Ghica-i, yaküm-a team-i Tenla ki ka den kiojen 19 long agi chiteta yangluba nguteta liasü, ta metetdaksü.

Tenla ki jaratem nungji tamangba yimsü dak sendakba ozülü balala aser Greek nunger oshi nung Lai otem zülua lir, ibaji ajanga iba region nungji akhidang tamangertem aser putirtem aliba jangjar, ta Ghica-i metetdaksü.

Ibaji ajanga Aso 5 buba (5th century AD) nungi tenzüka iba tesem nungji putirtem aliba jangjar, tang onoki bushitetba ya ajanga Egypt kübok iba region nung mezüng tamangertem aliba aser kiojen yangluba yimya taliba angateter, ta paisa metetdaksü.

Tal Ganoub Qasr al-Agouz site ya Egypt linük yimtiba, Cairo nungi southwest tsütsü aliba lisem lima nung lir; Aso 4buba nungi Aso 8buba tashi

iba tesem nungji nisungtem liasü, ta French Institute of Oriental Archaeology (IFAO)-i metetdaksü.

Iba tesem nung 2009 aser 2013 küm ali tua bushisüngdangba mapang nung yi yangluba aser yi rizünga ayuba tesemtem aser kiset shiruru balala metsüba jangjaogo, ta IFAO-i metetdaksü.

Tesüiba ita ishika Egypt-i archaeologist temi bushitetba aika sangdongogo, aser ibaji ajanga linük nung tourism ajungkettsütsü imlar.

Taküm February ita nunga küm 5,000 tejaklen yi yangluba tesem ka aser Alexandria yimti anasa küm 2,000 tejaklen indang 'mummies' nguteta liasü.

January ita nung Cairo anasa Saqqara archaeological site nung küm 3,000 dak tema 'sarcophagi' ka densema senti oset aika ngutetogo.

Mizoram nung Congress-i Arogotem aser NGOs dang tatok meshi

March 14, 2021: 1997 küm nungi 2015 küm tashi Mizoram ya 'Dry state' liasü saka Congress Party-i yi dak sendakba ozüng yanglushiba ajanga Congress-i election nung tamakok ngua liasü, kechiyong Khristan nütsüng timba aliba state nung Arogoi ozüng tasenbaji anema nokdak.

Iba dak sendakba nung tawa state nung opposition Congress Party-i Mizoram nung Arogotem aser lokti tentettem dang tatok meshiogo.

Küm trok tejaklen Congress-i Mizoram nung yi dokantem lapoka ayoktsü melaba ajanga 2018 küm assembly elections nung Congress-i tamakok angu, ta aikati bilemer.

Prohibition ozüng ya 2015 küm nungi 2019 tashi agiena liasü. Ano maneni state nung yi ayokba mesüra ajemba nokdanga 2019 küm May ita nung "dry state" aküm.

Mizoram Liquor (Prohibition) Bill, 2019 ya 2019 küm March 20 nü state Assembly nung agizük. Iba ozüng tasenba ajanga Mizoram Liquor (Prohibition and Control) Act, 2014 melen.

Iba ozüng tasenba kübok ozüng tera yanglushia defence sepaitem aser raliwalir bendangertembo yi ajemtsü atema temelaba agütsür. Ano doctor-i dang prescribe süra medical treatment agirtema yi ajemtsü melar.

Tan ita tetenzüklen taoba mapang Mizoram health minister aser Congress lenir, Lal Thanzara-i, 2008 küm nungi 2018 küm tashi party-i yimsüsüba mapang nung party-i aibelenba mapatem atema tatok meshir, ta metetdakja liasü.

Taoba mapang chief minister aser Congress Tir, Lal Thanhawla'er adianu, Lal Thanzara-i, 2018 küm Congress-i election nung

tamakok kanga mejungi angubaji state nung yi dokantem lapoktsü melaba ajanga liasü, ta metetdaksü.

Lal Thanzara-i, "Arogotem aser lokti tentettem taginüba anema onoki (Congress) yi dokantem lapoktsü mela aser yi ayoktsü atema permits agütsü, ibaji ajanga onoki taoba assembly election nung tamakok angu. 2023 küm taruba state assembly election nung onok nem vote agüja takok ngudaktsüra ozü lenirtemi yi ayoktsü memelatsü. Onoki aibelena inyakba atema Arogotem aser melungtet teloktem dang tatok meshir," ta ashi.

State nung saru million 300 angutsü nükjidong nung 2014 küm July ita nung Mizoram sorkari bill ka agizüka yi yoktsü mela, aser ibaji ajanga parnoki election nung tamakok angu.

Mizoram nung nütsüng 87 (nisung 7,27,000) Khristantem lir.

ANO GO ABEN TSÜNGREM DEN

KODANG ASENOKI ARENDAKDIR

"Tomai parnok dang ashi, Ni pa tekabu nung kojai tarak mengura, aser kojai tarak nungji temeyong masenokra ni mamangtsü."(Yohan 20:25)

Mapang kar nung asenoki Tsüngrem dak tamang akaba ajema akümer. Kodangsa asenoki yimlaba mataloker mesüra tamang ka aliba talangka atatsüa akümer idangji Tsüngrem dak amanga aliba ya amajok amai bilemer. Laishiba nung Yisu shia aruba nung mamangjai aliba nisungji Toma liasü, kechiyong Yisu shia aruba mapang pa nütsüngtem den maliasü. Külem tembartemi Yisu shia aruba indang ashidang Tomai amangtsü memulungi aküm. Pa tekabu kojai tarak nungji pa temeyong masenok tashi amangtsü memulung. Saka hopta ka sülen kodang Tomai kuli aginüba ama Yisu pa matsüngdang sayu idangji Tomai Yisu chichiba shia aruba nung amanga liasü. Tamang makatetba nisung dangji Yisui jungkai adoka liasü, kechiyong Tomaji Yisu nütsüng ka liasü. Il Timoti 2:13 nung ashir "Asenoki tamang makatetaka, paibo tamang kateta alir. Kechiyong pai pei sasa menangzüki melitet." Asen Kibuba Yisu Khrista aser pa indang metetba shisatsü nung inra pa dak tamang akaba nung tarendak malitsü. Ainer ka dak yaktabo tamang makar, saka talangka meteta aliba nisung dakbo tamang akar. Yamaji nai Yisu metetba shisatsü nung anogoshia aintsü merangra pa dak kodanga rataa malitsü.

SARASADEM

Temeim Yisu ni na shia aruba nung amanger, aser na teti onok dan alitsü nangzüka nung teti tamang akar. Ni Ne dak marendaki amanger. Amen

India nung 'Temple Town' ozüng amshia Tenla kitem shibangtsür

March 14, 2021: Taoba ita India kübok Telangana state nung Hindu yimsü alia amangertemi police aser ali kibur ka ajungshia Tenla ki ka shibangtsüogo.

Tenla ki shibangtsütsü atema temeden lir, ta shia local ketdangsertemi state ordinance ka ajanga shimteta aliba 'temple towns' nungbo tanga tamangba yimsütem indang tekülem kitem yanglutsü memelar, ta ashi.

February 28, 2021 nü Telangana kübok Dharmapuri nung Pastor K. Samuel leniba nung Khristantem tekülem sentong tagidak mapang nung Hindu yimsü alia amangertemi timtem agüja liasü. Hindu nungertemisa Khristantem anemba yimyim aika ayima liasü.

Lokti jagi Pastor Samuel dang, nai Tenla ki shibangtsüla mesüra nai lendong ajurutsü, ta amokmerena liasü.

Tesülen Hindu nunger jagisa Pastor Samuel'er ki kibur dang Pastor Samuel kidang nungi mindoktsü atema mepishia liasü.

International Christian Concern (ICC) den jembidang Pastor Samuel-i, "Ni kong nungi teyari bushitsüar memeteti liasü. Ni police ajuru, saka police-ia kü dang


Dharmapuri jila nung tekülem sentong magitsüla, ta ashi. Tesüiba küm 5 tashi nung yangi lia arur saka ni kodanga timtem majurui liasü. Ki kiburi kü dang ki toktsür oang ta shiogo, anungji ni ki tasen ka bushidar. Joko yangi tekülem sentong magitetsüa akok ta ni bilemer," ta metetdaksü.

2007 küm state sorkari G.O. 746 lateta liasü, koba ajanga 'temple towns' nung tanga tamangba yimsütem indang tekülem ki yanglutsü memelar. Iba ozüng kübok Telugu oshi jembiba state tem nung Hindu nunger teküem ki tulutiba aliba jila, Tirupathi densema lir, ajisüaka tesülen iba ozüng kübok Dharmapuri jila-a züngokogo.

India nung Telugu oshi jembir jenti aliba states-Telangana aser Andhra Pradesh nung Hindu yimsü alia amangertemi Tenla kitem shibangdaksütsü aser Khristantem amokmerentsü atema 'temple towns' ozüng ya amshir.

ICC den jembidang Telangana nung Khristan lenir kati, "Tang mezüng state nung tamangba yimsü tsütsü yimtenren aitdaksür. Tamangba yimsü nung ajemdaker tamang mekatetba yimya ka tenzükogo," ta ashi.

OLONG PAITEP # 5753



TIPILEN

2. Teka mapa tajung
4. Anakshinüba
5. Süoshi agi tazü
9. Aria bilemtep
11. Ajemalu ozü
12. Tzü an
13. Teben teloktep

LANGTSÜNGLEN

1. Anepalua inyak
2. Teptsü
3. Nok agi raratep
6. Kibong aküm
7. Nüji masü
8. Taruba küm
9. Teka shidok
10. Meputep/Mapet

OLONG PAITEP # 5752 TELANGZÜBA

TIPILEN :

1. Alang, 3. Pakti, 7. Bangka,
8. Sar, 9. Menungrar, 10. Pen,
14. Kümzü, 15. Anema, 16. Kimen.

LANGTSÜNGLEN :

1. Amena, 2. Aibelen, 4. Ayak,
5. Tenyar, 6. Ngs, 8. Sangküm,
9. Menden, 11. Kilen, 12. Aküm,
13. Ama.



SOBANGBA-I ALOKBA DANG BACKWARD RESERVATION INDANG ASÜNGDANGER

Sobangba : Temba Alok...Ni mangatetba aser ratamataba olen kar asüngdangdi...Backward ta asüba ya shirnok dang ajar ??? Aser ano Backward-pur atema sorkar mapa nung seat kar reserved sua yutsüba ya kechi tetezü ???

Alokba :Ena temba... Backward ya shisaliok nung tangar memenuptem dang ajar. Sorkar mapa nung Backward-pur atema seat kar shiteta reserved sua yutsüba, ya parnoki Forward kintem den kasa metokteptetba agi seat kar balaka shiteta yutsür adii.

Sobangba : Adjaaa... Surabang tanga tanüngba seat atema toktepba nungjibo Backward purtemjibo madentsü sudi ???

Alokba : Eeesssh temba...Ano mapang kar nungbo tanga tanga tanüngba seat nungjia backward purtemjiang adoker nung koda...!!!???

Sobangba : Waammaaa...Surabangla ajibo asenoka Backward-a ta dang sunuaali...!!!

Lilir : L.Kika Pongener.

TANÜBO NAI LANGZÜANG

Q. Singorgarh Fort ya koba State nung lir?

- A.Maharashtra B.Madhya Pradesh
C.Gujarat D.Delhi

===== (Taruba adok nung onoki langzütsü)

YASHI ADOK TELANGZÜBA : 2015

AO OSHI ANGAZÜKDAK
TANÜ ANGAZÜKTSÜBA OJANGTEM



Tir Yimym

Aki

(v.) Ayi agitettsü merangba
(piercing skin to remove thorn/splinter)
•Küsa ne kü tetsüng nung ayi aki.

Akhi

(n.) Alemli / Taoba mapang (Olden days)
•Akhi mapang tsüraburtemi süng aser long külem.

NAI-A YA METETTER MA?

MARCH 15 NÜ ASOR TONGTIBANG NISUNG KAR:

- US Tir tenetbuba Andrew Jackson (1767)
- Actor Joe E. Ross (1914)
- Apollo astronaut Alan Bean (1932)
- U.S. Supreme Court Justice Ruth Bader Ginsburg (1933)
- Musician Phil Lesh (Grateful Dead) (1940)
- Singer/songwriter Mike Love (Beach Boys) (1941)
- Musician Ry Cooder (1947)
- Musician Dee Snider (1955)
- Actor Park Overall (1957)
- Model Fabio Lanzoni (1959)
- Singer Terence Trent D'Arby (1962)
- Singer Bret Michaels (1963)
- Actor Eva Longoria (1975)
- Actor Jai Courtney (1986)
- Actress Alia Bhatt (1993)
- Rapper Yo Yo Honey Singh (1985)
- Indian professional wrestler Kavita Devi (1983)

SUDOKU # 5794

3	9	1	8		4				3	2	9	6	7	8	4	5	1
	5							9	1	8	7	5	2	4	6	3	9
				5	9			8	5	6	4	9	1	3	7	8	2
		4				7			8	4	5	7	3	9	1	2	6
		3					1		7	3	1	2	6	5	8	9	4
9		5		3	2		6	4	6	9	2	8	4	1	3	7	5
8				6	3	5		2	4	5	8	1	9	7	2	6	3
			2	4			7		2	7	3	4	5	6	9	1	8
4	3		7	1	5				9	1	6	3	8	2	5	4	7

TELANGZUBA # 5793

OJANG LUTEP # 5340

ETSKAKHIR	:	
AKIAJ	:	
ANMERGA	:	
AGEZÜNR	:	
SÜAAJKA	:	
OLOTEKK	:	
HIRABTECAI	:	
NGMEZÜ	:	
NJANJEG	:	
TETTONGER	:	

OJANG LUTEP TELANGZÜBA # 5339

KHEN KHENBO OPANG MAPU MESÜRA TIMTEM
AJANGA TEMBARTEM TESENDAKTEP RAKSADOKER

TAN HOPTA ATEMA - KOMA SÜLA ?

Q. Asenok sobaliba nung ali senmang amangtepba yimya ya, akhi tsürabur senmang aser tanü putu senmang ta ana küma bendanger amangtsü tenzü, nunga koma süla?

Olong 20 shi nung March 12, 2021 tashi nung iba telangzüba ya onok dangi (e-mail - tiryimym@gmail.com) :
(SMS - 9856121232 / 9436072422) : (WhatsApp - 7005723372 / 8729995804) : (tiryimym.in) ajanga yokang. Telangzübatemji taruba Honibarnü adoktsütsü.

Mamata-i wheelchair nung mener nüboyim sentong nung shilem agi



Kolkata, March 14, 2021: Amongnü Kolkata nung TMC tongti aser West Bengal Chief Minister, Mamata Banerjee aser TMC lenir, Abhishek Banerjee na den tangartemi 'Nandigram Diwas' rally nung shilem agiba noksa nung angur.

Kolkata, March 14 (Agencies): Anogo ishika tejaklen Nandigram nung election nüboyim sentong ka nung Trinamool Congress (TMC) tongti, Mamata Banerjee tetsüing yiruba sülen Amongnü lai wheelchair ka nung mener Kolkata nung TMC pur road show nung shilem agi. La den TMC lenirtemi Mayo Road nungi Hazra More tashi (kilometer 5) shilem agi. 2007 küm Land Acquisition anema longkak aitba mapang police-i injang yokba ajanga yimdakilir 14 khasetba nüngtem nung 'Nandigram Diwas' anogomong nung TMC-i iba sentong ayongzüka agi. Mamata-i twitter ajanga, "Onoki maneni tasü itta raratsü. Ni tang tashi timtem nung lir,

saka ni nüburtem timtem atema taliba bilemtsür. Asen li kümzüksü atema raradang asenok kanga timtemogo aser ano maneni taliba timatemtsü, saka asenoki mapudaktsü," ta metetdaktsü. March 10 nü la Nandigram nung yiruba sülen la Kolkata nung aliba SSKM hospital nung among aser March 12 nü discharge süa liasü. 'Banerjee ya Bengal jala" ta ozülü amer TMC pusemertemi BJP anema yimyim ayimba den külemi taruba election nung bendangertem tamakok ngudaktsütsüla, ta ayongzüük. Ano külen, Mamata yiruba dak sendakba nung Election Commission (EC)-i Director Security Vivek Sahay aser Purba Medinipur nung Superintendent

of Police, Pravin Prakash na mapa nungi anentsütsü atema telemtetba agiogo. EC-isa District Magistrate, Vibhu Goel agiena non-election post ka lezmüksü. March 10 nü Mamata yiruba dak sendakba nung West Bengal chief secretary aser special general observers- Ajay Nayak aser Vivek Dube nungeri report agütsüba nung ajemdaker Election Commission-i telemtetba agia liasü. "Chief Secretary-i Nandigram tatalokba tembanga bushisüngdangtsü aser taruba anogo 15 tsüingda ozüing nung ajemdaker temerenshi agütsütsü. Iba dak sendakba report ji March 31 tashi nung Commission nem agütsütsü," ta EC-i metetdaktsü.

BJP-i Bengal election atema Babul Supriyo dena candidate 58 sangdong

New Delhi, March 14 (Agencies): Amongnü Bharatiya Janata Party (BJP)-i West Bengal assembly elections atema candidate tem tenüing sangdongogogo. Bengal nung election shilem tasembuba atema BJP-i candidates 27 aser shilem pezübuba atema candidate 38 tenüing sangdong; parnok rongnung Union Minister Babul Supriyo aser taoba mapang TMC lenir, Rajib Banerjee na densema lir. Tawa TMC lenir, Rajib Banerjee-i BJP nung aden aser pai Domjur menden nungi tokteptsü; taoba mapang Chief

Economic Advisor, Ashok Lahiri-i Alipurduar menden nungi tokteptsü. Rabindranath Bhattacharya-i Singur menden nungi, Swapan Dasgupta-i Tarakeswar menden nungi, Nishit Pramanik-i Dinhata menden nungi aser Union Minister, Babul Supriyo-i Tollygunge menden nungi tokteptsü. BJP-isa actor nungi yimtenren nung ajemoksang aser party MP, Locket Chatterjee nem Chunchura menden lezmüksü aser Anjana Basu nem Sonarpur South menden lezmüksü. Indranil Das-i Kasba

menden nungi aser actor Tanushree Chakraborty-i Howrah Shyampur menden nungi tokteptsü. Tawa BJP nung adener, actor Payal Sarkar-i Behala Purba menden nungi aser actor Yash Dasgupta-i Kolkata kübok Chanditala menden nungi tokteptsü. Bengal nung election mezüngbuba aser tanabuba shilem atema BJP-i tamalen candidates 58 sangdonga liasü. West Bengal nung March 27 nungi tenzüka election shilem ti lemsar agütsü aser May 2 nü vote zünga election osang sangdongtsü.



Prayagraj, March 14, 2021: Samajwadi Party tongti lenir, Akhilesh Yadav den party nung inyaker nisung 20 anema FIR benokba anema Amongnü Prayagraj nung SP nung inyakertermi longkak aita Uttar Pradesh Chief Minister, Yogi Adityanath noksa rongdokba noksa nung angur. Moradabad nung osangbenertem senden ka nung osangbener ka dak azükba dak sendakba nung Yadav den party nung inyaker 20 anema ken o benokogo.

Assam dak alaka BJP-i state ajak nung tamakok angutsü: Sharad Pawar

Pune, March 14 (Agencies): Amongnü Nationalist Congress Party (NCP) Tir, Sharad Pawar-i, BJP-i Assam dak alaka tanüingba state asemprongla aser Puducherry Assembly elections nung tamakok angutsü, ta metetdaktsü. Baramati jila nung osangbenertem den jembidang Pawar-i, item states aser UT tensa aser osangtem nung ajemdaker pai iba ya asadangtet, ta ashi. Pawar-i, Centre nung BJP sorkari West Bengal nung Trinamool Congress tongti lenir aser West Bengal Chief Minister Mamata Banerjee anema tashi tali amshidar, ta aitsü. "West Bengal nüburtem dak peisasa akhümtsübuba shisatsü keta lir. Kari danga Bengali nunger sobaliba anema inyaktsü merangra state nüburtem ajaki longjemer raratsü," ta pai ashi. Iba ama tensa ka nung nisungtemi kechi jembidir jemiaka Mamata Banerjee-i maneni takok angutsü, ta paisa

metetdaktsü. Kerala dak sendakba nung Pawar-i, NCP-i ruling Left Democratic Front (LDF) den lokteper tokteptsü, aser taruba election nunga parnoki majority angutsü, ta ashi. Tamil Nadu dak sendakba nung pai, opposition DMK aser DMK tongti, M.K. Stalin-i AIADMK sorkar atsüingdoktsü, kechiyong state nüburtemi sorkar melentsü atema Stalin yarütsü, ta ashi. Assam dak sendakba nung Pawar-i, Assam nung tang BJP sorkar lir, aser tang-a parnok jenjang junga lir ama reprangteter, anungji maneni parnoki takok angutsüa akok, ta ashi. Assam aser West Bengal na nung March 27 nungi tenzüka election shilem aika lemsar agütsü aser Kerala, Tamil Nadu aser Puducherry nungbo April 6 kija nung election agütsü. State pezü den UT Puducherry nung May 2 nü vote zünga election osang sangdongtsü.



Dehradun, March 14, 2021: Amongnü Dehradun nung Uttarakhand Chief Minister, Tirath Singh Rawat-i tang mezüng Chief Minister mapa agizükba noksa nung angur.

Covid tasen putetba shilem 87.73 bo state 7 nungi lir: Health Ministry

New Delhi, March 14 (Agencies): Maharashtra, Kerala, Punjab, Karnataka, Gujarat, Tamil Nadu aser Madhya Pradesh state tem nung anogo shia coronavirus tashidak nisung aika dak puteta arudar, aser tesüiba ghonda 24 tsüingda coronavirus tashidak putetba shilem 87.73 bo item states nungi lir, ta Amongnü Union Health Ministry-i metetdaktsü. Tesüiba ghonda 24 tsüingda Maharashtra nung nisung 15,602 dak iba tashidak putet, Kerala nung nisung 2,035 dak aser Punjab nung nisung 1,510 dak iba tashidak putet. Tang India nung coronavirus tashidak agi teshirangdakpur lakh 2.10 jungogo aser teshirangdakpur shilem 76.93 bo Maharashtra, Kerala aser Punjab nung lir. Tesüiba ghonda 24 tsüingda nisung 16, 637 anepogo aser linük nung iba tashidak agi shiranger anepba ajak senteperbo 1,09,89,897 jungogo. Tesüiba ghonda 24 tsüingda iba tashidak agi nisung 161 asü aser asürtem shilem 84.47 bo

state asem (Maharashtra, Punjab aser Kerala) nung lir. Tesüiba ghonda 24 tsüingda states aser Union territories 14 nungbo coronavirus agi shinga masü aser item states aser UTs ji- Rajasthan, Jharkhand, Puducherry, Lakshadweep, Meghalaya, Daman and Diu, Dadra and Nagar Haveli, Nagaland, Tripura, Sikkim, Ladakh, Manipur, Mizoram, Andaman & Nicobar Islands aser Arunachal Pradesh lir. Linük nung coronavirus vaccine dose crore 3 jungnüa agütsüogo; coronavirus vaccine dose ajak agi 2,97,38,409 agütsüogo, ta Amongnü anepdang 7:00 ako nung Ministry-i metetdaktsü. Iba nungji mezüngbuba dose agir healthcare workers 73,47,895 aser frontline workers 11,35,573 lir, tanabuba dose agi healthcare workers 42,95,201 aser frontline workers 73,32,641 densema lir. Co-morbidities keta alir arrshi küm 45 ser temapur 14,40,092 aser teintet sensotem 81,87,007-i mezüngbuba dose agiogo.



Moscow, Russia nungi southwest tsütsü mile 125 shi pilar Nikola-Lenivets yimtsüung nung aliba Nikola-Lenivets art park nung Maslenitsa (Shrovetide) benjong amungba nung shilem ka ama chiba ki mesüka süng agi yanglur rongdokba noksa nung angur. Maslenitsa ya Orthodox Christian indang benjong ka lir, koba Orthodox Lent atongtsü anasa amunger.

Myanmar civilian lenirtemi nüburtem pisasa kümzüksü maongka agütsüner

Mandalay, Metsüremi/ March 14 (Agencies): Myanmar nung parallel civilian government acting lenirtemi ashiba agi, nüburtem nem parnok sasa lendong balala nokdangtsü atema ozüung kübok temeden agütsütsü asoshi inyaksü. Linük nung mepetmesü adoker nisung 80 dak tema sür aliba mapang tang lenirtemi iba jenjang agitsü asatetogo.

National League for Democracy Party nungi lenir Mahn Win Khaing Than shiba ketdangser tejen aika den jenshia senzüdar, pai Facebook ajanga nüburtem den sensaksemba mapang "Linük asoshi tang tamangtiba mapang ka lir aser tesangwa angutsü ana nung lir," ta ashi.

Paissa, civilian sorkari militaryi tashiyim amshiba anema nüburtem pei sasa kümzuka alitsü atema temzüng ozüung kübok temeden agütsütsü asoshi merangdangtsü, ta ashi.

Honibarnü tashi nung nisung 80 dak tema tepsetogo, ta Assistance Association for Political Prisoners advocacy group-i ashi. Nisung 2,100 dak tema puogo ta parnokisa ashi.

Honibarnü nisung 13 tepsetogo. Mandalay nung sepaitemi longkak aiterem dak injang khaloktsüba sülen nisung pongu asü aser nisung aika yirua liasü.

Pyay jila nunga nisung ana tepset aser Yangon nunga manger mesangwa tsüngda nisung asem tepsetogo, ta domestic media sangdong ajanga metetdaksü. "Parnoki hadir mebeni longkak aitba nüburtem den rara nung ama inyaksangshir," ta Mandalay nung amendaker aliba activist Myat Thu-i ashiba den asür rongnung arishi küm 13 tanur ka densema liasü, ta ashi.

Longkak aitera Si Thu Tun-i ashiba agi, Buddhist monk ka densema nisung ana kasetba pai nguogo. Tena

rongnung ka dak tepoklanglen akha aser ka kanga kanga mejungi kaset, ta pai ashi. Chauk jila nunga tata gari anishir ka dak police tem teku nung akha ta tembar kati ashi.

1988 küm security forces-i khasetsang Phone Maw asüba anogo bilemteta amungtsü atema social media nung nüburtem dang mepishiba sülen Honibarnü tesem aika nung longkak ait.

Iba sülen 8-8-88 campaign ta nüngja agütsür military sorkar anema Myanmar nung nüburtem apuso. Iba mepetmesü nung nisung 3000 shitepseta liasü.

Iba movement mapang Aung San Suu Kyi ya democracy icon ka aküm aser pa küm metsü shi kidang sabanga toktsü. La 2010 küm chiok aser lar party National League for Democracy-i 2015 küm election akok aser taoba küm November ita-a election koka liasü.

COVID-19 cases tsütsü Brazil-i India ajatetogo

Brasilia, Metsüremi/March 14 (Agencies): Brazil nung COVID-19 cases ajungbena timba kuma alima nung coronavirus agi tamajungtiba kongshiba linüktem rongnung jenjang tanabuba tongteta India ajatetogo. Honibarnü Brazil nung nisung tasen 85,663 dak iba virus puteta liasü.

Linük nung tesüiba ghonda 24 tsüngta COVID-19 agi nisung 2,216 asüba osang lir, aser ibai küm ka tejakdang tashidak wara tenzüker anogoshi amai nisung süyonga aruba mapang anogo ka nung nisung 2,000 dak tema asüba anogo asembuba alitsü. Iba linük nung virus tabu tasenba, koba dang P1 mesüra Brazil variant ta ajar, iba virus ya putetba sülen COVID-19 cases kanga agi timba akum.

Brazil nung COVID-19 tensa ya taoksatsüka lir aser tekeratiba nung mera agitsü nungdaker, ta World Health Organization (WHO) ajanga shiogo.

Iba virus tabu tasenba ya yimya balala lir, anungji menatepa aoba kanga agi tezupaba kumdaksür, ta WHO indang COVID-19 nung technical lead, Maria Van Kerkhove-i osangbener dang

Hokulbarnü shia liasü.

"Ajidang masü nisung kangshiba yimya nunga tamajungba lir," ta lai ashi.

Brazil nung coronavirus agi meneper ajak senteper nisung 11,363,380 lir aser India ajateta alima nung iba tashidak agi tamajungtiba kongshiba linük jenjang tanabuba nung lir.

Iba linük nung COVID-19 agi nisung asüba ya 275,105 lir ta ketdangsürtemi ashir, aser ibai alima nung virus agi nisung timtiba asüba tsütsü United States sülen tanabuba jenjang nung lir.

Bodhbarnü Brazil nung nisung 2,286 asü aser Brehostibarnü nisung 2,233 asü, ta health ministry ajanga metetdaksü.

Tir Jair Bolsonaro, shibai coronavirus khuret mabener aser mozüa magitsü ta shia lir, pai mapang shidak nung nüburtem nem mozü magütsütetba atema kanga sashia aitsür, kong nütsüng yongsük shilem 3 dang mozü agia lir.

WHO Director-General Tedros Adhanom Ghebreyesus-ia, "Brazil nung alir ajaki tensa süoki ia agizüksüla aser kidanger linük nunga kongshitsü," ta Hokulbarnü shia liasü.



Wilmington, Del nung aliba Brandywine Catholic Church nung US Tir Joe Biden-i Mass sentong nung dener aoba mapang tangokba noksa ka yangi angur.

Longkak aiteri Argentina tir nem timtem agütsü

Buenos Aires, Metsüremi/ March 14 (Agencies): Patagonia region nung longkak aiterem Argentina Tir Alberto Fernandez mena aliba minibus ka nung tenük yoker long agi ona timtem agütsü.

Argentina south tsütsü Chubut province nung aliba community centre ka kima nisung telok ka Fernandez müketa adenshia pa mena aliba gari nung long agi aon aser atsiung.

Tir ya iba tesem nung morok mi agi nisung ka rongseta ano kar yirur aliba semdang liasü.

Saka longkak aitba yabo Chubut nung ali tulu topoka rongsen agitetba maparen (open-pit mining) tanaben tenzüksütsü sentong aliba anema liasü.

Iba region nungya sentilong (gold, silver aser uranium) telubusa lir, aser sorkari item sentilong agitet tenzüksütsü sentong yangluba ajanga longkak aiter ya mepelai akum, ta Clarin osangkaket ajanga ashi.

Fernandez ya pa indang

gari tsütsüi anir aoba mapang nüburtem ya community centre anasa adenshia liasü.

Iba sülen parnoki tir sülen anidaka oa pa mena aliba minibus nung teka agi tsünga tetsüng agi metsü tenzüker aser pa modaksütsü meranga gari nung long agi aon.

Nisung adenshia aliba ajanga pa aodang gari kijiba aiba raksar liasü.

Mapang tatsüka lir Tir Fernandez-i sangdong ka nung, iba ya nisung kari Chubut mesüra Argentina memeimba yong inyak südi, ta ashi.

Tawa Argentina indang Patagonia region nung morok mi tulu adoka ki 200 shi rongdok aser yangji aliba nüburtem dangaleni jena aotsüsa akum.

Jila kar nung electricity raksatsü aser kar nung tajemtsü tzü mongui akum.

Iba morok mi ya kechi ajanga tenzüker tang tashi mejangjateter, saka iba ya asaa inyakba mapa kar südi, ta Argentina interior ministry ajanga ashir.



Benjamin Netanyahu (File photo)

Jerusalem, Metsüremi/ March 14 (Agencies): Israel Ato Kilonser Benjamin Netanyahu-i, Yemen nung Iran-i teyari agütsüba telungpurtemi missile khaloktsütsü amokmerenba ajanga taoba hopta pai United Arab Emirates-i aotsü atema Saudi Arabia indang anüung mamshi, ta ashi.

Kidanger Jordan den mangatettep adoka Israel indang Ato Kilonser tayimtsü süitsü asoshi khen atema tenokdangba agütsüba ajanga Netanyahu taoba hopta

Emirates semdangtsü aliba athi.

Jordan anüung majangi Saudi anüung amshitsüba dak sendakba nung Netanyahu-i Israel indang Channel 13 dang, "hopta ka tejakdang Saudi Arabia anüung nung timtem adokogo," ta pa Yemen nung Houthi telungpurtemi missile amshia amakba indang ateshia ashi.

Netanyahu-i iba dak sendakba nung ken o rasaa mashi mesera pa indang tayimtsü Iran-i teyari agütsüba Houthis temi amaktsü renemer lir taa mashi.

Yemen nung Houthi telungpurtem shirnoki linük anütoklentip tuluba ka amokbanger lir, parnoki tawa arrtsü adener Saudi nung indang infrastructure tem maka arudar. Parnoki drone tem nung bomb alenoker yoka pokdaksüba den missiles dena amshia makdar.

Taoba hopta missile aser drone temi alima nung totzü belenshiba rongnendak tulutiba rongnung ka amak aser Jiddah yimti nung aliba international airport inyaksangshi mesüteri aküm. Lendong adokdaksüba koba Houthi telungpurtem nangzükogo, iba ajanga Saudi Arabia nung teraksatsüba tulu madok saka iba amala inyakyim ajanga alima rongsenketsüng nung kongshio go aser alima ajunga nung totzü belenshiba nung konshitsü ana nung lir.

United Arab Emirates den tesendaktep yanglushiba sülen küm ka ser tesadang nung Israel nung lenirtem rongnung Netanyahu-i mezüngbuba official iba linük semdangtsü liasü. Israel nung March 23 nü parliamentary elections magi tsüngdang UAE indang crown prince semdangba ajanga nüboyimba nung teyari agütsütsü Netanyahu-i imlaa liasü.

Oppo-i 'Find X3' aser 'Find X3 Pro' saya



New Delhi, Metsüremi/ March 14, 2021 (Agencies): Alima shishilembaba tesem balala nung Oppo Find X3 series sayaba sangdongogo. Iba smartphone lineup nung Oppo Find X3 Pro, Find X3 Neo aser Find X3 Lite densema lir. Item variant den külemi vanilla Oppo Find X3 smartphone-a sayaogo, saka iba smartphone ya China nungang angutsü.

Find X3 smartphone ajanga nung Qualcomm processor aser quad rear camera dena lir aser smartphone ajak yagi 65W fast charging support asür.

Oppo Find X3 - 8GB RAM + 128GB variant jenjang CNY 4,499 (sen 50,400) aser 8GB RAM + 256GB storage variant jenjang CNY 4,999 (Sen 56,000) asütsü. Find X3 ya black, blue aser white sentsü nung angutsü. Ano külen, Oppo Find X3 Pro ya variant ka - 12GB RAM aser 256GB storage nung angutsü aser iba smartphone jenjang EUR 1,149 (sen 99,800) asütsü. Ajisüaka, company ajanga Oppo Find X3 Neo aser Oppo Find X3 Lite indang jenjang memetdaksü. Iba den külemi item smartphone ya India shishilembadak sayatsü asoshi osang agüja mali.

Oppo Find X3 Pro nung 6.7-inch LTPO AMOLED display den 120Hz refresh rate, Quad-HD+ resolution aser 92.7 percent screen-to-body ratio dena lir. Iba display panel yagi peak brightness 1300nit den 800nit support asür. Find X3 Pro ya flagship Qualcomm Snapdragon 888 processor den

Adreno 660 GPU, 12GB LPDDR5 RAM aser 256GB UFS3.1 storage ajanga tashi agütsür. Phone yagi dual-SIM cards (nano) support asür aser Android 11-based ColorOS 11.2 out of the box ajanga achaayangtsür.

Iba smartphone tesülen rectangular module ka nung quad camera inoka yanglutsüogo, kong 50-megapixel ultra-wide-angle camera den f/1.8 aperture aser OIS support, 50-megapixel wide-angle camera den f/2.2 aperture aser omnidirectional focusing angutsü. Ano camera setup ana nungji 13-megapixel telephoto camera den 5x hybrid optical zoom aser 20x digital zoom aser 3-megapixel micro camera dena lir.

Selfie tangoksü atema, iba phone tejaklen hole-punch cutout nung 32-megapixel selfie camera angutsü aser OIS optical anti-shake support asür. Camera maparen nungittsü atema, Oppo Find X3 Pro nung portrait mode, multi-scene video, slow motion, time-lapse photography, super text, AI ID photo, microscope aser cute shooting dena lir.

Tanga feature tsütsü reprangdangra, iba smartphone nung under-screen fingerprint, 5G, LTE MIMO, Wi-Fi 6 aser Bluetooth 5.2 angutsü. Oppo Find X3 Pro nung 4,500mAh dual-cell battery (2200mAh + 2250mAh) inoktsüogo aser battery yagi 65W Support SuperVOOC 2.0 fast charging aser 30W wireless charging

support asür.

Ano külen, Vanilla Oppo Find X3 nung 6.7-inch LTPO AMOLED display den 120Hz refresh rate, Quad-HD+ resolution, aser 92.7 percent screen-to-body ratio keta aliba angutsü. Phone maparen, Qualcomm Snapdragon 888 processor paired Adreno 650 GPU, 8GB LPDDR4X RAM aser 256GB of UFS3.1 storage ajanga achaayangtsür. Camera specification tem Oppo Find X3 Pro ama alitsü. Oppo Find X3 nung battery tasazük 4500mAh battery lir, koba ajanga 65W fast charging support asür.

Oppo Find X3 Neo nung 6.55-inch AMOLED display den 90Hz refresh rate aser Full-HD+ resolution angutsü. Phone nung Qualcomm Snapdragon 865 chipset den 12GB RAM aser 256GB internal storage ajanga tashi agütsür. Iba smartphone tesülen quad camera system ji Find X3 aser Find X3 Pro nungi balaka alitsü. Iba camera setup nung 50-megapixel primary camera, 16-megapixel wide-angle camera, 13-megapixel telephoto lens aser 2-megapixel macro shooter angutsü. Selfies tangoksü atema, smartphone tejaklen hole-punch cutout 32-megapixel sensor dena lir. Iba phone nung battery tasazük 4,500mAh alitsü aser 65W fast charging support asür.

Maneni, Oppo Find X3 Lite tereprangtsü Oppo Find X3 Neo ama lir, saka 6.4-inch Full-HD+ display den 90Hz refresh rate angutsü. Phone tesülen quad camera setup nung 64-megapixel primary camera, 8-megapixel wide-angle camera aser macro/mono photos atema 2-megapixel camera inoka yanglutsüogo.

Selfie atema, X3 Lite tejaklen 32MP selfie camera angutsü. Iba phone nung 4,300mAh battery ka angutsü aser 65W fast charging asür. Oppo Find X3 nung octa-core Snapdragon 765G SoC den 8GB RAM keta lir. Variant ana ama, iba phone yagi 5G connectivity support asür.



Amongnü nikongdang Ao Baptist Arogo Padumpukhri, Dimapur nung Tetsü Oshi Anogomong sentong nung lanurtemi ayongzüka agidang agiba noksa ka yangi angur. ABAP nung February 21 nü lanurtem jubilee mong aliba agi Alima Tetsü Oshi Anogomong tanü March 14 anogo nungang among. Iba sentong nung onük jembir K.Temjen Jamir, Yimozulur, Tir Yimiyim liasü. (March 12, 2021)

Grammy Awards 2021: Taylor Swift, BTS aser Harry Styles nungeri shilem agitsü



Mumbai, Metsüremi/ March 14, 2021 (Agencies): Recording Academy-i aruya aliba 63rd Grammy Awards sentong nung shilem agitsüpur artist tenüngtem sangdongogo. Tan Grammy Awards sentong nung music industry tsütsü tongtumbang artist talisa Taylor Swift, BTS, Harry Styles, Chris Martin, Cardi B, Dua Lipa aser Billie Eilish nungeri shilem agitsü terenemba lir.

Iba award sentong nung shilem agitsüpur artist line-up tem Grammy Awards indang official website nung agütsüogo. Item artist rongnung Puerto Rican rapper Bad Bunny, psychedelic soul band Black Pumas, singers Brandi Carlile, DaBaby, Doja Cat, Mickey Guyton, Haim, Brittany Howard aser Miranda Lambert nunger dena lir.

"Artist tem tekümdangtsü meratem nung anidaka telongjem nung pei pei music sempet balala ajanga sentong mera ketdaksütsü," ta Academy-i lemsatep.

Tanga artist dak alaka,

Rapper Lil Baby, John Mayer, Megan Thee Stallion, Maren Morris, Post Malone aser Roddy Ricch nungeria iba award sentong nung ken atentsü.

2021 Grammy Awards atema nominee timtiba angur rongnung Dua Lipa, Ricch aser Swift nunger dena lir. Parnok asempronglai nomination trokrok ngua lir. Kasa mapang, nomination list temaba nung nüngtugu pop star Beyonce dena lir, lai nomination 9 ngua lir. Aruya aliba Grammy Awards sentong ya March 14 nü Los Angeles Convention Center nung ayonga agitsü. Kasa mapang, sentong nung adener ajak COVID-19 temzüng agi melaba ama tekümdangtsü meratem nung anidaksü.

Maneni, category balala nung Grammy nomination aser takok angur tenüngtem sangdongtsü atema tanga tesemtem amshitsü. Taküm Grammy Awards sentong ya nüngtugu comedian Trevor Noah-i ketdang (host) asütsü.

Akshay indang 'Sooryavanshi' April 30 nü sayatsü

Mumbai, Metsüremi/March 14, 2021 (Agencies): Bollywood star Akshay Kumar indang kanga dang yongya ataba action film "Sooryavanshi" April 30, 2021 nü sayatsü terenemba lir. Nüngtugu film yanglur Rohit Shetty-i direct asüba film ya India nung dang masü saka alima tesem ajunga nung sayatsü, ta film yanglurtemi sangdong ka ajanga metetdaksü.

Iba cop-action-drama film ya taoba küm March 24 nü sayatsü renem, saka India nunga alima ajunga asüngba coronavirus wara adokba ajanga film theatre ajak shibangtsü ozüng agütsüba yong, iba film sayatsü anogo atsülangtsü.

"Iba film theatre ajak nung sayatsü. Asenok ajaki iba film reprangtsü yongya aruogo aser kopi meli asenoki iba film asangsang nung angutsü! Aa Rahi Hai Police. #Sooryavanshi film ya April 30, 2021 nü alima ajunga nung sayatsü," ta Twitter ajanga Kumar-i lemsatep.

Taoba küm March 2 nü film

indang teaser ka sayaa liasü aser iba teaser sayaba sentong nung Ajay Devgn, Ranveer Singh, Katrina Kaif aser producer Karan Johar densema cast temi shilem agia liasü. Teimla tulu nung iba film sayatsü renema liasü, saka March 25, 2020 nü India ajunga lockdown alitsü sangdongba sülen film sayatsü anogo atsülangtsü.

"Mapang tetemjen ka nung 'Sooryavanshi' theatre nung sayatsü asoshi onoki audience dang nangzüko. Küm ka süia arur sülen iba film sayatsü asoshi maongka tajung nguogo, koba asenok ajak asoshi osang tajung lir," ta film yanglurtemi video ka lemsatep.

Devgn indang "Singham", "Singham Returns" aser Ranveer Singh indang "Simmba" sülen, "Sooryavanshi" ya Shetty indang police film pezübuba alitsü.

Sooryavanshi ya Reliance Entertainment ajanga sayatsü aser Rohit Shetty Picturez den Dharma Productions aser Cape of Good Films longjemer iba film produce süogo.

Chhetri medeni India tebur Football Team sangdongogo



Sunil Chhetri (F/Photo)

Metsüremi/March 14, 2021 (Agencies): Züngsem 27 agi kümtetba India tebur senior national team, Oman aser UAE den friendly asayatsü aliba atema renemshitsü asoshi Hombarnü Dubai-i aotsü.

Oman den March 25 nü asayatsü aser UAE den March 29 nü asayatsü. Asaya anaprongla Dubai nung dang asayatsü. India team international level nung tatemsa 2019 küm November ita FIFA

World Cup Qatar 2022 World Cup Qualifiers nung asayaa liasü.

Ajisüaka nüngtugu striker Sunil Chhetri team den külemi maotsü, kechiyong pa dak Covid-19 tashidak potetogo. Chhetri ya India nung rongnungi international football nung goal timtiba idaktsüba asayar lir. Pai goal 72 idakja lir aser pa dang lokti nungi pilar temang anepaluba mapang ka lir.

Head Coach Igor Stimac-i ashiba agi, "international jenjang nung tanaben asayatsü atema onok ajak adenshir renemshiba atema kanga pelar. Team nung asayar tasen aika lir aser parnok ajak meranga inyaktsü mapang lir. Camp parnoki koma agizüker aser asenok tarutsü koda ali ibaji onoki asadangtsü."

Coach-isa, Brandon Fernandes, Rahul Bheke, Sahal Abdul Samad aser Asish Rai

nunger tang temang anepaluba mapa asüba ajanga meshim, ta ashi.

Friendly atema asayartem yamai alitsü:

GOALKEEPERS: Gurpreet Singh Sandhu, Amrinder Singh, Subhasish Roy Chowdhury, Dheeraj Singh.

DEFENDERS: Ashutosh Mehta, Akash Mishra, Pritam Kotal, Sandesh Jhingan, Chinglensana Singh, Adil Khan, Mandar Rao Dessai, Mashoor Shereef.

MIDFIELDERS: Rowllin Borges, Lalengmawia, Jeakson Singh, Raynier Fernandes, Anirudh Thapa, Bipin Singh, Yasir Mohammad, Suresh Singh, Halicharan Narzary, Lallianzuala Chhangte, Ashique Kuruniyan.

FORWARDS: Manvir Singh, Ishan Pandita, Hitesh Sharma, Liston Colaco.

Punjab Kings Bowling coach asütsü Damien Wright shim

New Delhi, Metsüremi/March 14 (Agencies): April 9, 2021 nü nungi tenzüksü aliba Indian Premier League atema Punjab Kings-i bowling coach asütsü Australia nung first-class cricket asayar Damien Wright aniokogo.

Arishi küm 45 tain Wright ya Bangladesh U-19 cricket team indang head coach liasü aser head coach & Director of Cricket Operations, Anil Kumble tawabangba kübok pai Punjab Kings pur bowling nung nungita yaritsü.

"Punjab Kings atema bowling coach ama inyaktsü maongka anguba den parnoki kü dak temulung lemtetba asoshi pelar. Iba team dak tejangraba lir aser tan IPL season nung squad telungtet nung linük balala nungi



Damen Wright (File photo)

asayar tajung den support staff team den külemi longjemer inyaktsü asoshi yongya atar," ta Wright-i ashi.

Taoba mapanga Wright-i Australian Big Bash League indang telok Hobart Hurricanes aser Melbourne Stars naprongla nung bowling coach ama inyakogo. Ano külen, New

Zealand team nunga Wright bowling coach liasü.

Wright aser Kumble na dak alia, Punjab Kings support staff rongnung taoba mapang assistant coach Andy Flower, batting coach Wasim Jaffer aser fielding coach Jonty Rhodes nung dera lir.

"Iba wadang (bowling coach) tsütsü pa (Wright) dak tajangshiba aika lir aser team jenjang tali dang akangashitsü atema pa sempet ajanga asayartem nungittsü. Taruba IPL pa den longjemer inyaktsü asoshi onok yongyar aser pa sempet ajanga team nung temelenshi tulu adokdaksütsü teimla lir," ta Kumble-i ashi.

KL Rahul lenisüba kübok Punjab Kings-i April 13, 2021 nü Mumbai nung Rajasthan Royals den asayatsü terenemba lir.

Open Super Six Cricket asayamung tembangogo



Metsüremi/March 14, 2021 (TYO): 1buba Open Super Six Cricket Tournament, March 14 nü Ruzuhukhrie Government Higher Secondary School Ground, Kohima nung tembangogo. Iba asayamung Youngsters Club-i kokogo.

Final asaya nung Youngsters aser N. V press na asaya. Mezüng bat asüba sülen Youngsters-i over 6 nung run 52 yanglu. Asaya tanabuba shilem nung N. V Press-i over

6 nung run 37 dang yangluteta asaya makok. Asaya nung man of the match naroküm Bishal nem agütsü.

Pre-quarter round nung N. V Press aser K.O.D.H nati W. E. L. P aser M. C Aloo akok. Mezüngbuba quarter final asaya nung Youngsters-i Silverbacks wicket 3 agi akok. Tanga quarter final asaya ka nung B. R. T. F (A)-i Sunari Union akok aser X. L Red academy-i Jagernauts

tsükdaktsü.

Mezüngbuba semi final Youngsters aser B. R. T. F(A) na asaya, koba Youngsters-i wicket 2 agi akok aser tanabuba semi nung N. V Press-i run 16 agi X. L Red tsükdaktsü.

Asayamung convener-i, mezüngbuba senpet sponsore asüba atema Raju Roy dang kanga pelaba lemsatep. Paisa Kohima District Veterans Cricket Club, cricket asaya meimertem aser media & DIPR danga kanga pelaba lemsatepa liasü. Iba dak alia ground amshitsü atema temelaba agütsüba atema ketdangsertem dang kanga pelaba pai lemsatepa liasü.

Kasa anogo asayamung ayonger, United Brothers aser sponsors tem exhibition match ka asaya, koba asayamung ayongertemi akok.

Mumbai-i Vijay Hazare Trophy kokogo

New Delhi, Metsüremi/March 14 (Agencies): Deobarnü Vijay Hazare asayamung final nung Mumbai-i wicket trok agi Uttar Pradesh kokogo. Asaya nung Mumbai captain Prithvi Shaw-i ball 39 nungi run 73 yangluba aser Aditya Tare-i out mesüi century yangluba ajanga par team nem teyari agütsü.

Mezüng bat asüba sülen UP nungi asayar Madhav Kaushik-i out mesüi run 158 yangluba dak ajemdaker parnoki run 312 yanglu, ajisiüka Shaw aser Tare nati kanga junga asayaba ajanga Mumbai-i ball 51 anunga lia asaya akok.

Mumbai team-i tang agi Hazare asayamung pezübuba kokogo aser Shaw atema teti bilemtetsüba asayamung ka liasü, shibai run 827 yanglua asayamung ka nung run timtiba yangluba otsü tasen ka yangluogo.

Shaw (39 balls, run 73; 10x4, 4x6) aser opener Yashasvi Jaiswal (29; 3x4; 1x6) nati kanga junga asaya tenzüker aser over 9.1 nungbo run 89 yangluatoker liasü.

Shaw-i tetenzük nungi bowler ajak indang ball nung boundary züka kanga junga asaya aser pai

ball 30 nung run 50 yanglu ajisiüka mapang tatsüka dang lir Shivam Mavi-i aonba ball züktoktsü merangba mapang out asü.

Iba sülen Jaiswal aser Tare na senteper run 38 yanglu ajisiüka Shivam Sharma indang ball nung Jaiswal-i azükba Mavi-i ajepzüka out sütsü. Iba mapang tashi nung Mumbai team 8.5 runs per over nung asayaa liasü.

Iba sülen Tare-i out mesüi ball 91 nung run 107 yanglua par team takok dangi ani. Pa nem Shams Mulani-i (36) teyari agüja liasü.

UP batting amenba mapang Madhav Kaushik-i out mesüi run 158 yanglua parnoki asayar pezü out ser run 312 yanglu.

Kaushik shibai four 15 aser six pezü züka run 156 yanglu, pa aser Samarth Singh (balls 73, run 55; 4x4; 3x6) na senteper run 122 yanglu, ajisiüka Mumbai team-i parnok dang nungi tajungba asayaa asaya akok.

Scores tatsü agi: Uttar Pradesh 312/4 (Madhav Kaushik 158 not out, Akshdeep Nath 55; Tanush Kotian 2/54, Prashant Solanki 1/71), Mumbai 315/4 (Aditya Tare 118 not out, Prithvi Shaw 73, Shivam Mavi 1/63).

Tetsür cricket asayar rongnung Mithali-i tama ODI run 7,000 yangluogo

Metsüremi/March 14, 2021 (Agencies): India tetsür team nungi batsmen tejen Mithali Raji-i Deobarnü alizüng tasen ka tongteta, tetsür Cricket asayartem rongnungi ODI cricket nung run 7,000 yanglutetba mezüngbuba asayar kümogo.

India team captain-i asaya 213buba nung run 7000 yanglutetogo, koba tang South Africa den asayaa aliba asayamung nung ODI pezübuba liasü.

"Magnificent Mithali! #TeamIndia ODI skipper tetsür cricket asayartem rongnung ODI run 7,000 yanglutetba mezüngbuba asayar kümogo," ta BCCI-i tweet asü.

Arishi küm 38 tain asayar shiba India team nungi mezüngbuba 1999 küm asayaa

liasü, la ya ODI asaya nung tetsürtem rongnung run 6,000 yanglutetba mezüngbuba asayar liasü. England tsür Charlotte Edwards shiba 2016 küm international cricket asaya nungi anenogo, la run timtiba yanglur rongnung tanabuba jenjang nung lir, lai run 5,992 yanglutetba lir.

South Africa den ODI pezübuba asayaba mapang Mithali-i ball 71 nung run 45 yanglur lia over 38buba nung medium pacer Tumi Sekhukhune-i la out sütsü. Asaya nung lai boundary pezü züka liasü.

Hokolbarnü tasembuba asaya nung Mithali ya format ajak nung run 10,000 yangluba India tsürtem rongnungi mezüngbuba asayar aser alima ajunga nung tanabuba asayar aküm.

Penalty shoot-out asayamung nung AR-i shilem agi

Dimapur, Metsüremi/March 14 (TYO): HQ IGAR (North) kübok Assam Rifles Phek Battalion, Phek District, Nagaland nung March 13 nü local administration-i ayongzüka local penalty shoot-out asayamung ka nung shilem agiogo.

Asayamung nung shilem agiba nükjidongji akoktsü atema dang masü saka nüburtem atsüa arutsü atema liasü. Local lanurtem den sendakteptsü atema saisapong ya lenmang ajak dang tajungtiba. Iba tetoktepba nung team 26-i shilem agi. Asaya ajak knock out basis nung asayaa liasü.

Kasa mapang nung Assam Rifles Jalukie Battalion-i ayongzüka Jalukie nung March 13 nü friendly football asaya ka asayaogo

Lokti menentsüba maparentem anema raratsü aser lanurtem aser security forces tsüngda tesendaktep tajungba küma yanglushitsü nükjidong nung iba asaya ayongzüka asaya. Kasa mapang nung security forces-i nüburtem atema bendanga agüja inyakba atema lanurtemi tenüngsang agüja liasü. Iba asaya nung Jalukiekam nungi lanur 20-i shilem agia liasü.

BILEMDANGANG

"Pei tejangraba minykdangi mapang süitema teyok."